

بنعیش.. بنص روح

عبد الناصر حجازی



رئيس مجلس الإدارة
د. أحمد نوار
رئيس الإقليم
سامية فياض
مدير الفرع
محمد خضير

مدير التحرير
محمد أحمد المقربي
الإخراج الفني
عباس الطرابيلي
التدقيق اللغوي
محمد سعد بيومي
المتابعة الإدارية
هنية باشا محمد
السيد هتيمي

• بنعش.. بنص روح
• عبد الناصر حجازي
• الطبعة الأولى:
الهيئة العامة لقصور الثقافة
إقليم القناة وسيناء
2007 م
• تصميم الغلاف: د. خالد سرور
• رقم الإيداع: ٢٠٠٧/١٤١٥٨
• الترقيم الدولي: 977-437-380-4
• المراسلات:
إقليم القناة وسيناء
٦ ش عدلى والجيش بالاسماعيلية
بريد: ٤١٥١١ ت.ف: ٠٦٤/٢٩٢٢٦١٢
• الطباعة والتنفيذ:
شركة العمل للطباعة والنشر
ت: 3904096

الآراء الواردة في هذا الكتاب لا تعبر بالضرورة عن توجه الهيئة
بل تعبر عن رأى وتوجه المؤلف في المقام الأول.

السَّامِعُ الْمُبِينُ
حَاتَمُ عَبْدِ الْهَادِي
هَذِهِ تِلْكَ طَرَفٌ
يَجُولُ بِهَا عَيْسَى
أَنْ يَرَوْقَ لِلْجَسِيرِ
أَخْوَادُ
فِي بِلَادِهِمْ هِيَ زِيَادُ
يَوْمَ ١٠/١٤١٠
لَكُمْ اللَّيْلَةُ ع ١٠:٥
٢٢٨
١٤٦٧٨٨٥٦٧
٦٦٢٢٢٨١٢٧

بنعيش.. بنص روح

بنعیش.. بنص روح

إهداء

إلى (الكلمة) التي عقدت قراني
عليها كي أثبت للعالم (بكارتها)

أنا منكم

أنا زيكُم
بفرح ساعات واحزن كثير
أنا منكم
من حيّكوا الشعبى الفقير
لايس هدومكوا الباهتة من عرق الشقا
نايم معاكوا ف قوضة باردة ضيقة
باكل رغيفكوا المحشى جوع
فارس ولكن بعث م الحوجة الدروع
وباحارب الهكسوس بأخر حثة من عضمى
وبارفض تتنصب..
فى مشاعرى خيمة لحتلال
لسايا باحبى عالصابون
لسه الورق مارضعش من سن القلم
سرسوب كلام
شعرى المكسح
ماشى بيدور على إزازة دوا..
لهشاشة الأحلام
يا هلتري.. علاجى هالقاء عندكم؟
بحلف لُكم
وحياة تشابه جرحنا
وحياة مرارة قمحنا
أنا منكم

الصرخة

من قبل ربح الاستكانة..
ما تقلع الوجد العفى
طلق الحياة
طردنى من سجنى الصغير
لابتدايات اعتقالي
نزلت خائف م المكان
وبدهشة حاوطوني الجيران
قالم معانا يا غريب أو ضدنا؟
واللى انت عايزه عندنا..
أو فى التراث؟
فتحت عين الاحتراس
لقيتها مش أرضى،
ولا وطنى،
ولا أهلى
لقيت إله الخوف بيندهلى
عيونه قرصين شمس
ودراعه. لسان أفعى
ومتحاوط بميت سياف
وخفت لاحسن اخاف
وقفلت بوابة ودانى

ونزعت عن فرسى العنيد..
كمامة الطاعة.
وصرخت.. قاللى يا غريب..
شرط الإقامة سكوت
صرخت تانى..
قال باقيلك صرختين وتموت
صرخت تانى بصلى..
وباندهاش
قاللى بلاش تركب دماغك يا غريب
لسه باقيلك صرخة واحدة عندنا
حاول تعيش على نهجنا
دا الخوف (أساس الحكمة) وسكوتك (خلاص)
دارت فى راسى الذكريات
يوم ما انولدت ويوم ما بويا فرحبى
ويوم ما علمنى على..
هرد الإزاز أحبى
عزقت تفكيرى بفاس الاختيار
وطردت من عينى الصور، غمضت عينى،
وفتحت قلبي للحياه
وصرخت صرخة..
كتبت لى عمر جديد

حافى.. فى دولة المسامير

مولود كفيف
ما بين مخازن حلمى باتسول رغيف
ساند على اكتاف الأمل
عاوج دراع الصبر إيد عكاز
يمكن عمايا يكون سبب جهلى ورثت عن أهلى..
جدار مهدود،
وحمل تقيل على اكتافى
مولود أناحافى..
فى دولة كلها مسامير
بارضع فى صدر الجوع..
وباشرب من عكار البير
مكتفانى الأسئلة،
حرّة فـ رقبتى السلسلة،
عطشان غنا،
وجدارى محتاج للبنا
وعشان كفيف
العتمة بتعرض وطاويط أزمى..
ع العريدة،
وخطوتى العرجة إستجارت م المسير
والذنب مش ذنبى،
ولا بإيدى انولد حافى..
فى دولة كلها مسامير

المشى عكس الاتجاه

دهست أفكارى اللي ماشية ع الرصيف،
وبتتبع كل البنود الواردة فى كتاب المرور،
وشلت من أيدها الكلبشات العجوزة..
والحواديت الغبية
إكتشفت أن الجواز من يومها باطل،
والعلاقة بين لسانى وفكرتى..
مبنية دايماع الخيانة
قمت شاييل من على .. شباك لسانى..
ستاير الليل البليد،
وأديت لأفكارى الجريئة..
الحق فى المشى المخالف للمرور
عشان لقيت أفكار كثير..
حطت شرفها ع الصينية وقدمتها للضيوف
حرضت أفكارى إنها تعدى..
بدون ما تبص لإشارة المرور
أو تنزعج من صوت كلاكسات الموديلات القديمة،
والسريينة المتحفية،
وقلت لازم تكسرى ازاز الـ (فيميه)
عودتها..
ما تدوشش يوم ع الفرملة،

تسبق تمللى المرحلة،
توصل لأطراف المجرة
يكفى إنى غلط مرة..
لما طلعت لـ(لسانى) يومها رخصة للكلام،
وختمت أفكارى بشعار الجمهورية
م النهاردا..
ها قطع الرخصة اللى ياما سببت..
للناس حوادث
وامشى عكس الاتجاه.

زوايا الفراغ

أنا اتعميت..
ولا الوجود فاضى؟
شايق قصادي فراغ..
مالو هيش حدود
هو الوجود..
فعلا كده فاضى.
ولا السبب إني..
منيش موجود؟
جدر الحواس (ميت)
و (الحى) بس الخوف
بفتح قوى عنيا
لكن بدون ما بشوف،
وادخل بلاد روى
بعصايتى واتحسس
ألقى (العمار) (منهار)..
و (خرابها) (متأسس)
لانا اللى جوايا
ولا حتى ناس تانيين
وأسأل كتير نفسى
أنا (نفسى) ولا.. مين؟

يمكن أكون مولود..
ما زحفش لسه الدود..
على قلبه و اتمد
يا جهلى ما تحدد
لانا بوجدى سعيد
ولا بالعدم راضى
أنا اتعميت بصحيح..
ولا الوجود فاضى؟

حوّا.. مش من طين ودم

إتخبطت ف خطوتي،
ووقعت من سطح المتاهة
فانكسر لى ضلع كنت معشمة..
أعمل به حوا
وحبة الضحك اللى أنا حوشتهم.
أتدلّقوا من قلبى ساعة ما انكفيت
وفضلت الملم نفسى من بين الحصى،
وارمى.. بحملى عالرصا،
واشعر بجوع بيعض روحي،
ودعوتى العاقر بتزعق فى السما
لكن بدون ما «المائدة»
تنزل على.. قلبى الجعان
يمكن عشان ناقض وضوئى،
أوعشان سايب فى قلبى كام صنم..
ذكرى.. من الشرك الأخير!
يمكن عشان سلفت نفسى للطغاة،
واديت حواسى للعدم!
محتار..
ومش عارف سبب..
حزن السما منى

وقرنى الحادى والعشرين..
بينكرنى،
ومش لاقى.. دليل واحد..
على . ملكيتى لنفسى،
وراكب مركبى الكرتون
ومش قادر.. على النوة
عشان ضلعي اللى كنت معشمه..
اعمله به حوا..
إنكسر،
وحية الضحك اللى أنا حوشتهم..
أتدلقوا من قلبى ساعة ما انكفيت

الأعراف

دللت نفسي..
لجل اطول الأرض..
ولقيت المدى.. واسع
كأن الأرض مش عايزانى احصلها
بقيت محتار..
ما بين باب السما المقفول،
وبين .. خطوة .. بتطردنى
معلق .. بين طلوع الروح،
وبين . الخلد.. فى البرزخ،
بانكفى.. فوق خطوتى،
وباختنفى. عن عيني .. خلف الأمكنة
تلعب بكوم قشئى.. الرياح،
والصرخة تليعها السحب،
وملامحى تبهت..
من غبار الأسئلة
لحد إمتى هعيش رهين المرحلة؟؟
واقف على الأعراف..
بادور.. عالمصير
يتبل ريق زوحى..

بطعم الاحتضار،
وعيونى تتزغلل..
باشباح الرؤى،
ولعة الضلعة،
وادور.. تحت رجلياً..
على مربع ثبات..
أدق فيه..وتدى،
ودايخ،
وابتديت اشعر..
بسرسة الحواس،
قلقان.. على روى..
لا تتعب برضه من بعدى،
وترفضها السما
وتنطرد.. م الأرض،
ويتم اعتقالها وتنصلب..
زىي.. على الأعراف

الهوا اللي ف صدرى حادق

وف كل ما اطلع سلّمة..
الاحظ أن الارض لازقة ف رجلى،
ويتطلع معايا السلّمة
وفى النهاية
بالقى نفسى..
لسه باتتنفس تراب،
ورجلى لما تحركت..
كان باقى جسمى أسير،
وكننت يادوب..
باققلب نفسى جوة المصيدة
ما قدرتش أسلخ جلدى واهرب..
من خيالى،
واكسر القالب لأنه بجد ضيق،
والهوا اللي ف صدرى حادق
مستحيل تفضل مفاصلى العمر كله..
زوايا حادة
لا اقدر افرد إيدي اطول.
بيها النجوم،
ولا أمدّ رجلى للوسع
كل المعادلات..
والرموز الكيميائية اتدلقت..

فى المعمل اللى تجاربى فله متأجلة؁
واللحظة مش عاطيانى فرصة..
أنى ارسم «بورتريه» للكون؁
ولا اقطم لقمة من خبز الحصاد
ما باصدق افرح.
لما اشوف الشمس راسمة هيكلى؁
إلا والاقى المغربية بتشطبه؁
والف جوة الدائرة ادور..
عن خطوطى المستقيمة..
فاصطدم.. بالمنحنى؁
وارجع لأول سلمة..
ما طلعتهاش
سكة سفر طويلة؁
والعقل الهزيل..
هو الحصان..
إلى اشتركت به فى السبق
يادى المسافات البعيدة؁
والمحطات المشابهة لبعضها
حاسس كأن القطرشايل..
جتتى وطايح؁
ولما أبصر م الشاباك..
باشوف .. نفس الصور.
نفس المكان
والاقى رجلى..
لسه غارسة.. فى التراب

عينى أوسع م الصور

بدأت احس ان ف دماغى..
تخته مكسورة ومفيش..
سبورة تشرح للبليد المسألة
كل الزوايا اتمردت ع المنقلة،
والحسبة خالفة إنها..
ما هتبقى صح
عمال أحقق فى المناظر..
اللى لسه ما شفتهاش
والكون كبير
لكنه أضيق من خيالى
وعينى اوسع م الصور،
والرحلة محفوفة بمخاطر، وبقلق
واقف طابور..
مستنى دور لجل اتخلق،
وبرضه حاجز ليا دور..
فى طابور موازى لجل اموت
بهتت على بعض المعانى،
والكلام أصبح محير
والكتب مش قادرة ترمى لعقلى لسه..
طوق نجاه
تايه ما بين أحياء بيغتصبوا الحياه،
وميتين بيشوهوا شكل القبور

والشوك فى دقن الأرض.
كرهنى انى ابوسها،
والسما بتمطر ملل
وكان نصيبى من البلل..
بيعادل الباقيين
وعشت العمر باتأمل فى لوحة..
قالوا عنها..
مش ناقصها الا الرتوش
لكن لقيتها يادوب رتوش..
ناقصها لوحة،
واختلفنا فى المسمى،
واتفقنا كل واحد يبقى ليه..

رأيه الأحادى
ماحنا دايمًا..
كل ما بنوصل لروحنا..
إيد ثقيلة تشدنا،
وتشق بيننا،
وبين ذواتنا..
بحر هادر
نفسى اعدى البحر شايل جوة قلبى..
كوم سفنج،
والحق الروح اللى بتدحرجها قدامى الرياح
نفسى أبنى خيمة ف ارض خالية من العناكب..
والصقور
تحمينى من أحياء بيغتصبوا الحياة،
وميتين بيشوهوا شكل القبور

كلب مسعور

فيه كلب مسعور.. جوة جسمى..
لسه بيهوهو،
وبيجرجرنى ويآه.. أشتهى..
عضم العبيث
مولود معايا ف طلق واحد،
وابتدا .. يحتل مملكتى..
بوضع الإيد،
ويجبرنى.. أشاركه
فى الحياة والموت،
ويقطع لى .. حبال صوتى..
ويزرع جوة حنجرتى..
تقاوى نباح
نبحت معاه.. على روحى
لحد ما روحى خشت عالفرق،
واستجدت بيا وشدتنى..
من الحبل اللى فى رقبتي.
بدأت أبكى وحدفت الكلب..
بالعضم اللى لميته،
ولاقيته .. خش جوايا، استخبي..
فى انحناءاتى

يحرّضنى .. على نفسى،
ويرمى اللحمه لعيونى الجعانة،
والصراع يشتد بين روحى وبين..
كلبى اللى مش بالسهل إنه.. يتهزم

عود كبريت

قمت خائف
أجرى ع الشباك.. ولكن..
ما القيتوش،
والمكان..
أضيق من القبر ب تلت تربيع حياه،
والسما عاقر...
مفيش فوق حجرها الأسود..
هلال،
والنجوم كانت مسافرة
كنت انا.. فى الكون لوحدى،
والضلام حاطط عنيا..
جوة عبه،
والمكان مش لاقى فيه..
جذع نخله يهزه قلبى..
لجل ترميله الأمان..
ولا نار..
ترجم ضلال..
كونى بـ«قبس»
فجأة.. طلّت من عنيا..
نظرة لسه فيها نبض
شفت نقطة نور بتلمع..
فى المازوت،

واما ركزت انتباهي..
شفت خرم النور بيوسع..
حبة حبة لحد ما اتحول..
لخاتم..
قمت راشق فيه صباغى،
وابتديت .. أفتح شبابيك الرؤي،
وارمى عيني ع السكك
شفت ماردا
لأ ما هوش ماردا عشان..
ما ابقاش بابالغ
شفت حاجة قريبة.
من شكلي خالص
بتناولني شمعة مطفية وتقوللى:

خد عشان تعرف تشوف
أو تقابل نفسك اللي بتشتهيها
لجل تسحب جنتك..
برة النفق
قلت لكن شمعتك مطفية..
قالت: لكن أحسن من مغيث
مش فاضل لك..
إلا عود كبريت تمللى تضيّعه
لو تفتش..
جوة روحك،
هاتلاقيه

روحى آيلة للسقوط

روحى آيلة للسقوط،
والشروخ اللى ف جدارى..
كل يوم بتمد لما حصلت أطراف ضوافرى،
واتحاصرت بكل تجار الفرايا والهدد
فى انتظار لحظة سقوطى المدهشة،
وانتشارى فى السما شوية غبار
كل يوم باشعر ديبب الزلزلة
كل خطوة تهز فىا اربع حيطان
فد ابدأ امسك (فىا) جامد،
واجرى واتعلق فى روحى
تنتشلنى من المزاد،
وانتشله من السقوط
واكتم الآهة اللى بترأود مشاعرى ع الصريخ..
كل ما اقطع لحمى ارمم بيه شروخى،
كل ما اخطف روحى من إيد الهدد..
واجرى بيها،
ويطاردننى الاهتزاز،
ويساومنى ع السقوط،
واتفاجئت بشىء قتلنى..
لما باقلى مرة جلدى..

لقيتني شايلا جوة منى حد منهم..
من مقاولين الهدد
شفته فين؟ شفته فين؟
وايتذيت اتذكره..
أيوه هو..
كل ما امشى فى حته أشوفه يبص لى،
واخاف انا اتأمل عينيه..
لا يخطفوا منى البصر
فاهرب واسيب له شوارع العالم،
واكوم نفسى واتدحرج فى شرح،
ألقاه فى قلب الشرخ قاعد فى انتظارى
كل ما اسكن حته يطلع هو جارى
نظرتة.. بتهزنى،
سحنته.. خليتني آمن بالخرافة،
واما تخبط عيني ف عنيه الإزاز..
اتجاهله واعمل نفسى ميت،
أستخبي ف نفسى واهرب من عنيه،
واصرخ فى سرى: (ماعرفوش)
والنوبادى لما شافنى..
جرنى لقسم البوليس،
وقام مقدم ضدى دعوى ادخل فى طاعته..
لأنى لسه ف عصمته
واما قاللى القاضى روح ارجع لصاحبك..
صوته حطم فوق دماغى كل جدران العدالة،

وقلت: (أسف.. ما عرفوش)
الحرس (بإشارة واضحة) حط في إيديا الحديد،
والشهود اتحالفوا ضدى وقالوا فعلا هو صاحبى
وأما حققت فـ وشوشهم..
اتلقيتها وشوشه هو،
القاضى هو،
والحرس هو. ولقيت أن العدالة برضه هو
قمت صارخ فى الوشوش المستعارة:

مش راجع له .. مش راجع له
عشت طول العمر راع بين إيديه..
ما تلتقيتش ف شرعه جنة،
كلت تفاحه المحرم،
انتبهك روحى وعايزنى اصلى له ونا..
متوضى من نهره الجنب،
إحتلنى،
حط إسمه تحت صورتي،
حط صورته فوق ملامحى
إستلفنى ورافض انه يردنى
مش راجع له.. واسجنونى
يمكن القى ف سجنكم.. حريتى

مواجهة

رجعت اشبه..
ع اللى واقف فى المرايا يبص لى..
ويقول: نسيتنى؟
داحنا بيننا (عيش ودم)
قلت: انت مين؟
قاللى: احنا (واحد) من سنين بس أنت ناسى
قلت: أول مرة اشوفك
قال: بتكذب،
بص جوة (عنياً) تلقى (نظرتك)،
ونقطة العرق اللى (منك)..
نازلة من فتحات (مسامى)،
التشابه فى الملامح والأسامى،
والهوا اللى يخش (يملاى) الرئة..
بتطرده بلفحة (زفيرك)،
قلت: متهاياً لك انك تنتسب لى،
لو تحقق فياً تانى..
تلاقى فيه خط استواء..
قاسمنى انا.. وانت لروحين
قال: رح نشيله
قلت: فيه بينك وبينى سلك شايك

قال: وليه بنسيبه يتحكم فى (لحمنا) بالحدود؟
ما هو احنا شركاء لحم واحد،
دم واحد،
روحنا واحدة،
إنت منى ومش هسيبك،
مش هتخرج منى غير
والروح بتهجر (جتتك)،
يا الروح بتهجر (جتتى)
عشان يكون لنا تربة واحدة
إترعيت بجد منه وهو بيبرق..
وبيجر بسنانه
بس لمت الشجاعة اللي استخبت من عيونه،
واندفعت بكل قوة امسك لسانه
واما شافنى مصمم اخرج من هدومه
قام شاددى من القميص،
وقبل ايده ماترفع الكرياج عليا..
اتحدفت بقوة ناحية خلقته،
وفضلت احطم فى المرايا

أنا المزيف

ونسختى الأصلية ضاعت من زمان،
وماشى بالنسخة اللى كلها تعديلات
قلبي.. ملامحى.. ضحكى..
وكل أشيائى المهمة.. مزورة
مافضلش م النسخة القديمة إلا الهدوم
و (إسم) بينى وبينه غربة
أما (أنا) ما اعرفش مين
ونسختى الأصلية من يوم ما اختفت..
ونا خايف ارفع خلقى للشمس..
لا تبان الخدوش والتعديلات
أو ينقبض عليا واتحاكم على التزوير
وماشى غريب،
وجارر جسم مش طابقه،
وشايل وش مش لايق على هدومى،
ومش عارف لإمتى هاعيش مزيف،
أو لإمتى ها اترعب م الشمس..
وابحث عن ملامحى فى الرماذ
برىء أنا من تهمة التزوير،
ومجبر.. إنى اتوه،
ونفسى اقابل (نفسى) اخدها واعدى من..

شرح النفق
من أد أيه حاسس بغربة ف جتتي،
وكل قوضة ف جسمي فيها حد ميت
كل يوم مليون جنازة بتمشي في عروقي وصويت..
بيهد جوايا المدن
حاولت ارواح التربة ادور عن ملامحي
لكن لقيت الخطوة برضه مزيفة
وماشي باسأل (عنى) كل الأمكنة
ومش هاموت مرتاح بدون..
ما عتر على.. وشى القديم

مش موجود

وامازهقت من القعدة اللي بقالها سنين..
مستنظر فيها رجوعى
قلت اما ابحت (عنى) بشكل اكثر جدية..
جوّة حارات (الانترنت)
واما كتبت الاسم ودوست بسرعة (الانتر)
جانى الرد: (ما هوش موجود)
شكلى وسنى.. رقم تليفونى..
وبيتى ووطنى وبرضه الرد: (ما هوش موجود)
مديت ايدى ف جيبي سحبت بطاقتى..
لقيت بياناتها: بياض فى بياض
ولقيت صورتي بتسخر منى تقوللى: خرجت ومش هاتعود
الأوراق اللي ف دوسيهاتى بدون بيانات،
والبيانات الفاضلة ف ذهنى كمان مغشوشة
يوم واثنين بتأمل نفسى،
وأعصر ذهنى: شفت دافين؟ شفت دافين؟
خدت خيالى ف رجلى وقلت هالف بلاد الله
يمكن اقابل حد فاكرنى،
واما ينادى عليا ساعتها اعتر على (نفسى)
بس لقيت الناس بتشوفنى لأول مرة
ونا بالطبع بشوف الناس دى لأول مرة

دمعتى سالت ع الأسفلت،
استجمعت باقيت القوة اللي فى حنجرتى..
وحاولت واصرخ
ف لقيت صوتى (ما هوش موجود)،
وفضلت أجرى.. أجرى.. أجرى
شكل العالم كله ساعتها ما كانش عاجبنى..
وهو.. بينده على بعضيه،
واما رجعت البيت مهزوم..
جانى تليفون
واحد يظهر كان يعرفنى
قاللى.. انا بابحث عنك فينك؟
قلت اعذرني انا (مش موجود)

أنا اتحجمت فى النقطة

الدنيا سقعة..
ولأنا اللى ماشى عكس الاحساسات؟
يمكن عشان أنا جلدى مات..
من كترنومى ع الحشف؟
ولأ الخلايا ف قلبى ماتت ع الصليب؟
ساعات باحس ان جناحاتى..
عاجزة ترفع جنتى من الطين،
والاقى نفسى باتلاشى،
وباتحجم فى نقطة،
وأبدأ ارمى البوصلة واختار انى اتوه
مش شعر دا اللى بتسمعه
دى دمة من عقل الحكيم..
اللى اكتشف جهله..
فى أسهل مسألة
كل العواميد اللى شابلة حكمتى..
أكل اساسها النمل وجيوش الجراد،
والتوهة غطت عقلى بلحافها الثقيل،
والعالم الواسع..
بقى ف عينى..كقرص الاسيرين
ما بقاش فى عرق الرؤية دم

والمسافة اترهلت..
بين مركبى والشط،
والريح المعاكس فض لى غشاء الشراع
داخل مع النفس ف صراع
وشىء طبيعى .. ان انا..
يا اما انا اللى ها اتهزم
واحرم احذف فى السما شهبي،
واشيل من ع الرفوف كتبى،
واسلم عقلى للسجان
انا اتجملت فى النقطة،
وحتى النقطة مش لاقيالها لسه مكان
ونا أسف يا نفسى عشانى..
ما لقيتشى. لنفسى . نفس غيرك،
واتوضعتى .. فى المساحات الغلط
أسف يا روح
ما لقيتش روح ترد روحك،
وانسجنتى.. فى الزنازين البراح
أسف على لهجة كلامى،
وارتباكات الحروف
بس اللى عاش نفس الظروف
هايحس إن المعنى أكبر..
م القواميس البليدة
باكتب عن الحاجة الوحيدة
اللى انا مافهمتهاش

رغم اننا..
بنبص في وشوش بعض لكن عمرنا..
ما شفنا بعض،
وكل واحد منا..
بيبص ع النص المعتم للقمر،
ويفسر الضلعة بمعاني مضلعة
يعنى الغبار..
هو اللي باين في الصور،
والجهل ماسك دقة المركب،
وغارس في الحشف
يوماتي باتعاطي الأسف
أسف باقولها للهوا اللي ما شمتوش
لعمر عدي ما عشتيهوش
أسف باقولها لنفسى قبل الشنق..
بشوية ساعات
وخايف القى ان اللي مات..
واحد برى... مافهمتوش
ما تسألوش مانا زيكم
وهو آيه سر الأسف..
غير ان بينى وبين وضوح المسألة..
دخنة وغبار؟
غير إني مش لاقى ف هدومي الا البخار؟
ما عرفتش انى..
نقطة شاردة في الفلا..

غير لما بصيت فى المرايا لقيتني بانفخ..
فى التماثيل الخشب
ما قدرتش انى اوهب لها لحظة حياة،
ما قدرتش انى اوهب لها..
الأسف
أسف يا عقلى المستباح
أسف يا روح
ما لقيتش روح ترد روحك،
وانسجتى..
فى الزنازين البراح

إرميلي طوق

إرميلي طوق
لا الدوامات بتشدني ومحتاج لإيد.
تسحبني فوق
إرميلي طوق..
أرجع به تاني لدنيتي
من أد إيه عمال باعافر في الفرق،
واشرب في ملح
وألف مركب رايحة جاية تبص لى..
على إني ميت
رغم إن زفيرى بيهز الشطوط
وشافني يطلع ألف حوت
ما حد فيهم حب (ييلعني)
وسابوني اغطس واقب.. اغطس واقب،
ومن حلاوة روى باتعلق في كتف الموج،
واشرب على الحشف،
واحذف عنيا لآخر السكة ومفيش..
في مداها ضوء
إرميلي طوق
لا المية زى الثلج يتجمد لى نبضى..
والفرق رافع راياته الحمرا فوق عمرى،

وقربت..
رئتيني تتقايا الشهيد
مش وقت ليه أنا جيت هنا،
مش وقت مين حدفني من قلبه الخشب
دا وقت فاصل..
بين حياة بتشد جذرها من عروقي،
وموت بيغريني بكفن
والوقت ضيق والهوا..
بيهج من صدري،
وروحى استسلمت للريح
باموت .. باموت .. باموت
هاتسيبني اموت بدون ماترمي لعمرى قشاية؟
بدون. ما تشدني لو «سنتي» فوق؟
إرميلي طووووووق
إرميلي طوووق
إرميلي طوووو..
إرميلي طوووق
إرميلي طوو..
إرميلي طووو..

وضاق الكون على جسمى

ومش قادر..
أمدد رجلى ع الآخر..
ولا افرد صدرى واخذ..
م الهوا.. شهقة
وضاق الكون على جسمى
مع إنى ..نحيل جداً،
ومن كتر البعوض اللى افترس لحمى..
راقات جلدى المكرمش هلهلت ع العضم،
والضهر المائثب. مش لاقيله براح..
فى صندوق السما الضيق
ولما عرفت إن أنتى السبب..
وانتى اللى ضيقتى.. عليا الكون..
بقيت رافضك
ومهما حاولتى تغرينى بوعود (فالصو) ما اصدقكيش،
ومهما هتلبسلى قيمصك الشفاف..
مفيش بينا احتمالات للخصوبة
والملاحدة اللى انتى عايزانى ابقى منهم واعبدك..
بيكرهونى فيكى أكثر،
حسسونى ان الجواز منك (خطيئة)..
بعد ما فرشتى (البكارة) تحت رجلين الخطاة،

وخفت منك..
لما حسيت أن وشى بينسرق من فوق مرايتك.
والمساحيق الغبية..
مش مخبية الدمامة اللي ف ملامحك،
وأما شفتك ع الحالادي..
ابتديت اكسر مرايتك..
لجل احمر وشى من بروازك الضيق،
رميت لروحي (طوق) وفطمت نفسى..
لما حسيت أن صدرك بيساومنى علي الحياة،
وقدرت اخليكى .. على الهامش
بقيت املك فى (روحي) بلاد..
تساع الكون
وما استحملتش ابقى سجين..
فى كون ضيق على جسمى

غريب

أنا جيت لكم (مدفوع)
ومن يومها ..
ونا . تايه،
وبيحث عن طريق..
يرجعنى لبداياتى..
وارجع حقة (الطين) اللى فى..
ل(تاجرة التماثيل)،
ويخرج طيفى من سردابكم الضيق..
يفلفص .. للبراح
من يوم ما جيت..
والسكة ناصبة لخطوتى مليون شرك،
والخطوة شائلة لسكتى لفة بارود
وتهمتى الأزلية إنى (غريب)..
وضيف نازل على أغراب
لا قابلىنى على سريرهم..
ولا سريرى ببسلم من خطاياهم
ديح الضباب بيننا الرؤى
فد غسلت نى عنيا بشوية تراب،
وعرفت إن مكانى مش بين الرماد..
ولا فى الحارات الضيقة،

وفدأة النفس اللى طهرها الندى..
طلقت روى من حريم الأمكنة..
(تلت نويات)
وخايف اعصى ربنا..
واعيش معاهم فى الحرام
ونفسى اسلم نفسى خالى من الشروخ..
ومن الصدا،
وادينى بابحث (جوة روى)..
عن طريقة للرجوع
ما تفكروش اخترتكم
دنا جيت لكم (مدفوع)

عفار

نَفَضْتُ نَفْسِي مِنْ الْعَفَارِ
مَالِقِيْتَشْ تَحْتَ عَفَارِي بِرُضِهِ اِلَا الْعَفَارِ،
وَرِيْشْ .. وَرْدَمْ .. وَكُومْ هَدُومْ
فَقْلَعْتُ كُلَّ هَدُومِي وَالْآخِرَ لَقِيْتُ..
مَا فَضَّلَشْ مِنْي..
غَيْرِ يَادُوبْ (اللي اتَقْلَع)
فَدَعْرِفْتُ إِنِّي..
كُنْتُ لَافِفْ نَفْسِي فِي شَوِيَّةِ مَفِيْشْ
سَنِيْنْ كَثِيْرْ مَرْتْ وَآنَا..
بَانْظَرْ لِنَفْسِي فِي الْمَرَايَا الْقِي الضَّبَابِ..
مَا نَعْنِيْ مِ الرُّوِيَّةِ وَمَفِيْشْ فَوْقَ الْإِزَازِ..
غَيْرِ نَمْنَمَةٍ،
أَعْمَلْ لِنَفْسِي إِشَاعَةً تَحْتَ بِنَفْسِيَّةِ..
بِرُضِهِ مَا تَبِيْنَشْ غَيْرِ حَفْنَةِ عَفَارِ،
وَضَلَمَةٌ بِتَأَكِّدْ خَطُورَةَ أَزْمَتِيْ
أَخَافْ قَوِيْ،
وَارْجِعْ بِضَهْرِيْ لِحَدِّ مَا خَبِطَ فِي الْفَرَاغِ،
وَالْقِي الْحَقِيْقَةَ اِتْمَدَّدْتَ تَحْتَ الرَّمَادِ،
وَسَوْأَلْ شَرَسْ..
يَمْسِكُنِيْ مِنْ يَاقَةِ الْقَمِيصِ وَيَهْزِنِيْ:

لما انت م الأول عفار ..
طب ليه ما وجهتش لنفسك من زمان نفخة ..
وراحت الوجود من أزمته؟
حطيت لسانى فى الجراب،
ويلعت كل الأجوبة
عشان لقيت الاجوبة برضك عفار
دخلت قوضتى وابتديت ..
أبص تانى ف خلقتى،
وانفخ قوى .. أنفخ قوى
بعترت فى القوضه العفار،
وخرجت افتش (عنى) خارج هيكلى
بس اتفاجئت بالمطر،
والمية عومت العفار،
والأرض شدتنى ف شقوقها الغويطة،
واتلقيت ..
صورتنى الى تايهة معلقة ف كل الشقوق،
ف عرفت إنى رجعت للبيت القديم.

تأمل

قاعد مع نفسى
كتفى فى كتفى من الزحام
يهتز بى قطر التأمل
ينزل حفر.. يطلع تلال
أسرح.. تتوه الفكرة منى فى الجبال
وارجع ألام...
شمل ذهنى من جديد
والمح بعيد..
الشمس بتجرجر..
فى ديل فستانها وتروح
تعبانة سائدة فوق كتاف الغيم،
بتتطوح،
وتسلم الوردية لليل العجوز،
وتخش قوضة نومها وتمدد
وقع النهار من عالحصان
مات المكان
جلجل فى ودنى..
صوت خطاوى الصمت
بلعنى حوت الضلمة ولقيتنى
بقشر نفسى واتعري،

ویدخل.. جوة جوايا،
ویاخذ نفسی من إیدی...
ویطلع فوق
أوصل. حدود الأنسلاخ
تتقطع الأسياخ ویهرب هدهدی
یطلع لآخر سلّمة فی الکوّن
إستسلمت کل الحواس للنور
خرجت من نفسی..
اللی کل قوضها كانت ضیقة
وقلت لما ارتاح بقی
ونفضت عنی القشر ولبست الغمام
وسندت راسی ع السحاب
وبدأت انام
بدأت انام

بنعيش.. بنصّ روح

زاحفة الغيوم..
ع الشمس تلحس ضيها،
والليل جعان..
سعران يبيلع في النجوم،
والصهد جاي يطردنا من جوة الهدوم،
لسه الهباب لازق على حيطان المشاعر..
يخلق الإحساس من الضلع اللي ناخره السوس،
ودم قلوبنا ع السكة..
بيطرح (شوك آلام)
من كام زمن..
ونخلة الأحزان بترمي..
فوق قلوب الناس رطب
رغم الوصايا.. ملينا (دلو) المعصية..
من (بير) خطايانا،
وبعنا (نصّ روحنا) للديدان..
وينصّ روحنا الباقي بنشحطط..
جتتنا ... ع البارود،
ونروى أزهار الحياة بالدم،
ونحطم على اجبال الهدى (الواح)
لحد قلوبنا ما اتزحمت من التجاعيد،
ونصّ نجومنا تاهت في المجرة
و(السلام) ماتت عصافيره على..

غصن (المسرة)
مش بنادى بدين جديد
لكن ياريت.. من كل غيط..
نجمع سنابله المثمرة ونعجن بهم..
خبز السلام
ونرمى من فوق راسنا (الكليل الآلام)،
ومن عقولنا متاهة الأفكار،
وفي السكة اللي ممكن رجلنا تغرس..
نخطي بدون ما نرمى حمولنا ع الألغام
ما دام النبع واحد..
يبقى لازم نرتوى بالعدل
لا نعكر لبعض الحوض..
ولا نصب العطش في نهر احلامنا..
ولا نراهن خراب الكون..
على اللي يشيل نعوش اكثر
ياريت نقدر..
نعيش في المنطقة البيضاء،
ونتمركز في خط الاستواء،
نحرق كراكيب المشاعر..
والسنين المؤلمة
عشان يساعنا الكون ونقدر..
نمسح الدم اللي نازف م الكتب،
ونقطع السم اللي في ديول الكلام
ونا مش بنادى بدين جديد
لكن ياريت.. من كل غيط..
نجمع سنابله المثمرة ونعجن بهم..
خبز السلام

عصفور.. وألف ديناصور

قاعد قبال دكانى تحت النخلتين
بصّيت لقيت عصفور وقع..
جريت عليه..
من قبل رجل الديناصور ما تببطه
بصّيت لرجله لقيتها مكسورة ولاقيت
ماسك بمنقاره الهزيل..
بواقى آخر لقمة ممضوغة بسنان أمه
وسمعتها..
عمّالة بتصرّخ وتترجاني اسبيه ما ادبحوش
وتقولى وحياة (المحبة) ما تدبحه
وحطه فوق السطح قبل الديناصور ما يدوس عليه
خليه قريب منى لجل انزل واشيله
وابعد بعيد
عشان اكون مطمئنة..
إنك ما بتفكرش تصطادنا (سوا)
سالت دموع الديناصور على خلقتى
وصريخها بيصب فى ودانى..
عصير رصاص
رايحة جاية..
.. من يمين لشمال..
لشرق لغرب.
تصرخ كأن الحرب قامت وابنها .. أول أسير

وكأنها .. بتكمل المشوار (لهاجر..)
لجل يبقوا (ألف شوط)
وابص للعصفور الاقي عنيه.. متابعة الصوت
عمال يخلق فى السما..
وعنيه بتلمع م الدموع..
وبيص لى برهبة وفزع
خوفنى من نفسى وكرهت إنى استضيف
فى هدومى قلب الديناصور
مسكته من رجله السليمة..
رفعته فوق عشان تراقبه وتنفذه
وطلعت ع السلم..
وحطيته بهدوء فوق السطوح
وفضلت قاعد تحت مستنظر نزول أمه بقلق،
وبعد ما اعرف كام دقيقة
طلعت اشوفه..
ما لقيتوش
حسيت براحة..
وابتدا الوش البشوش.. يرجع لجسمى
بس فجأة..
سمعت نفس الصرخة بالبنط العريض
ولحت قطة بتجرى على السلم..
وقاطمة ببقها (عصفور هزيل)
أتارى فيه أشكال كتير..
للديناصور

الموت فى السر

بتستخسر فى نفسك ليه..
دقيقة حداد.. على روحك؟
دى تانى غلطة تغلطها
وأول غلطة يوم ما انت..
قبلت انك.. تموت فى السر
وكان يومها بإمكانك تعيش أكثر
لكنك كنت مستعجل
كأن الموت.. هاخلص قبل ما تدوقه
فمن باب الطمع مديت عليه إيدك
ومن يومها اكتسبت ملامح الموتى،
وكل شوارعك الفاضية اتملت خرابات،
وشمسك بطّلت ترسم لعضمك ضل
وتحاول.. تعيد خلقك
وكالعادة . بتنجح فى اختيار الموت
وبتأكد لنفسك.. إنفلات روحك،
وتمشى بهيكلك .. عريان
وقبرك كل ما بتمشى .. بيمشى معاك
لحد ما ييجى يوم دفنك
ولسه مفكر أن الناس
ما هيش عارفة خبر موتك؟
وبتفكر.. نجحت انك تموت فى السر؟

رجليّا الخشب

ماشى على.. رجلين خشب،
والأرض يتبخّ ف شرار
قدامى مشوار.. مفترض..
أمشيه .. يا يمشينى
ولو هامشى على يمينى..
إيدى عسكرى تمسكنى..
بتهمة إنى من أهل (اليمين)،
أما (الشمال) ممنوع،
ولو هقف مكانى هاترفع بالونش..
واتباع فى المزاد (خردة)
ف شىء طبيعى اخاف..
والجأ لعسكرى المرور،
وبخبرته العالية (يتوهنى)..
ويكتب ميت مخالفة..
ع (السؤال)..
ويقوللى: خليك ع الشمال احسن تتوه،
ألم عقلى اللى اندهس تحت اللوارى،
واحلف انى ما عدت ماشى ع (اليمين)،
أخذ شمال.. فى شمال..
فى ألف شمال.. ويااااه

الظاهر أن الوصفة مطلوبة
وما فضلش الا حودة ع (اليمين)..
ف قلت يستحسن..
أخش (شمال) عشان اوصل،
دخلت شمال..
لقت العسكرى بيقوللى: خش (يمين)
قلت انت غاوى ليه تتوهنى؟
دنا .. قربت م السكة..
ورجليا الخشب متحروقة من لسعة الأسفلت
قاللى: الطريق م الوقت (إجبارى)..
ومن حقى إنى احرر لك مخالفة اعتراض،
أخذت نفسى بسرعة من إيدى ومشيت،
وعدلت وشى.. نحية القبلة ورميت نفسى..
وعدت فوق دماغى
لوارى.. ومشاة .. واحصنة
لكن ما متش!!
واندهشت..
لما شفت العسكرى..
مادد إيديه..
وجاى يقومنى ويقول:
ومش هنسمح لك تموت
ما الموت لازم له برضه (رخصة)

هزنى

هزنى.
يمكن تلاقى فى الجريد..
حبة رطب
شدنى من نفسى قبل الانهيار
هدنى..
لو كان حلال فيا الهدد،
وابنى من انقاضى مدنة للبلد
لو تتوه السكة منى .. دلنى،
لما صهدى بيع منى .. بلنى،
لما تتجلط دمايا .. رجنى،
خش ذاتى،
سمم الوحش اللى مستوطن غاباتى،
مدنى..
بسلاح أبارز نفسى به،
شدنى..
من موت كرهت العيشة فيه
عنكبوت القهر عشش بين نجومى
شد خيطه.. فوق هدومى
مد إيدك ويا إيدى نلم خيطه،
حط كتفك جنب كتفى نهدي خيطه،

أعزق الأحلام بفاسك،
أعشق الأيام بقلبك
لو تبيع للضلمة فجرى..

خونتنى،
لو هتقبل إنى اموت مقهورها تبقي خونتنى،
لو قبلت تموت بدون ما ابقى الوريث،
لو قفلت ف وشى أحلامى الهويس،
لو رفضت تكون ونيسى فى المتاهة..
خونتنى،

ون صحيح بتحبنى..
مد إيدك جوة قلبى و هزنى

أخونك

إلى صديق تحالفت ضده أسراب العناكب

لو قبلت ان العواصف تبدرك
ولاً سيبتك فى النفق..
للعتمة ترضع من عينيك..
آخر شعاع،
أو ما نمتش جوة جحرك،
واقترسنا عضة التعبان سوا
أصل لما السم يسرى فى جتتين..
تأثيره يبقى.. محتمل،
وأما نجرى ف نحييتين..
هانهب الكلب الجعان
تستخبى..
جوة قلبى.. م العواصف،
واستخبى معاك فى «غارك»
وبشرايين قلبى هانسج..
فوق بيبانك عنكبوت
حتى لو هانموت،
فيكفى إننا هانموت بنحضن بعضنا،
وكل واحد منّا..
عايز يكون.. هو القاتل

أبقى نعيشك
لجل تتمدد في قلبي،
تبقى قبرى..
لجل تحرس جنتي،
والحياة..
ترضع من الدم اللي سايل مننا..
سرسوب غنا،
«والعشا» بيننا ما يبقاش «الأخير»
نوهب العصر الرديء..
ورداية تسترعورته
واوعى تحزن..
لما أسفلت الطريق..
يلزق في رجلك..
وأنت ماشى في زفتك،
أو لسان النمل يلحس خطوطك
بس كان نفسى أسالك:
ليه بتتبرع بدمك..
للعروق الميتة؟
ليه بترهن ضحكيتك..
عند تجار النواح؟
بس وحياة اللي بيننا..
مهما هب الريح ما يطفى
لمعة الشمس في عنيك
مهما قلبك ينحدف بالطوب..

ما يرمى الا الغناوى
لسه ناوى برضه تحزن..
ولا هاتنشف دموعك بالقصيدة..
وتقاسمنى عضّة التعبان عشان..
جرحك يا صاحبي يندمل!
أصل لما السم يسرى فى جنتين..
تأثيره يبقى محتمل.

تستلفنى؟

تستلفنى؟
بس لما احتاج لنفسى تردنى؟
ولا يومها ها تساومنى ع الرجوع؟
أو تبيعنى لحدّ يمسح بى الدموع..
أو يسفلت بى الطريق الغير ممهد؟
إوعى تزعل منى وتفكرنى لسه.. مش مأمّنك،
أو تقول بكسر بخاطرك
الحكاية باختصار:
إنى ما املكش الا (نفسى)
فـ تلاقينى.. صعب افرط فيها ولا..
يستلفها حدّ منى بدون ضمان
أصل ياما الناس خدونى..
واللى رجّعنى القانون
والنهارده.. لو خدونى منين هجيب تانى القانون؟
ما القانون من يوم ما سلف نفسه راخر..
لسه ما رجّعتش
يبقى ليا حق أشكّ ف ذمتك،
ليا حق امسك فى (نفسى) بالقوى..
لما اشوفك جاى تاخذنى بوعد كاذب،
أو تحاول تستلفنى بدون ضمان

شريكتي في الرحلة الجميلة

بيثبت لي الزمن..
إن الجمال ماخلصش..
والحب اللي بيننا..
لسه ما قدرشى.. على ورده الخريف
من كام سنة وانتى..
بتسقينى كاسات العشق وترشى..
على الورد اللي (بيننا) عبير
سنين الحب والعشرة الطويلة.. أكّدت لي..
إن الحياه.. إنتى ، ولولا انتى...
ما كان عصفورى هايزقزق على عودك،
ولا رقصت نجوم القلب لهلاك
ربطت العمر بأحبالك..
وطوّحته ف عنيكى الحبة بالأحلام
وما عرف عدّى من عمرى فى حضنك كام..
ما هى الأيام.. معاكى بتبقى شىء تانى مالوش تقويم،
ولما مشيت فى قلبك .. شدنى الترحال
ولو إحساسى كله اتقال
ما هيكفيني ألف ديوان
يا نسمة حب بتهفّف على الوجدان وتحيينى
سنين وانتى تقاسمينى ف شهيق الروح،

تشاركيني الألم فا يخف،
ترميلي ف (طوفان) الرحلة قلبك (طوق نجاه)،
وف ضلمة السكة ابتسامتك..
ترمي لعنياً النجوم والبدر
حلمنا كثير وأحلامنا..
بقالها عيال على كتافنا،
وزهرة حبنا طرحت غيطان أشواق
أنا وانتى . هانفضل عمرنا عشاق،
ولسة الرحلة فاردة العمر قدامنا
ولسه جميلة أحلامنا
بتتجدد في كل صباح
عشان يثبت زمننا أن الجمال ماخلصش،
والحب اللي بيننا..
لسه ما قدرشى.. على وردة الخريف
يا شريكتي في الرحلة الجميلة..
ياللى من دمك وهبتيني..
«ضياء» و«شريف»
وأصغر وردة في الغصن الندى (أحمد)
هقولك إيه؟
يا أجمل ذكرى في الماضي،
وأروع حلم جاي بكره
بحبك حب ما يعبرش عنه كلام ولا (شعرا)

سداسية (المحاكمة)

(١) فكّ كلبشى

فكّ كلبشى
أنا مش ها هرب من رجّالتك
هات النسمة اللى انت سارقها..
من رتّيني
إدينى الحق اترافع.
عن عصفورى المدبوح..
على باب هيكلك الدموى
وامنع غربانك تلقط قمحى
إدينى الحق انى امسح..
بصمات روجى من على مشنقتك
غلطة عمرى..
إنى فشلت ف تربية أحاسيسى،
ورضعت مشاعرى..
من حلمة جبروتك..
خمس رضعات،
وصنعت بإيدى..
نص كلبشاتك

ویدون ما أحسبها كويس
رَبَّيتَ تعابینك فی اجحاری،
ورمیت لأسودك..
لحم الطاعة.
لكن لما كمامتك..
خنقت بلبل احاسیسی
مدیت إیدی انزعها منعها كلبشك
وإیدین رجالتك..
غرزت ضوافرها ف لحمی
وانتقدمت اتحاكم..
على مدة إیدی
على شهقتی وانت بتخنقنی
على صرختی فی السكك الضلمة
قدمنی لأی محاكمة
لكن..
فك كلبشی..
علشان ارفع إیدی واشاور..
للقاضی عليك

(٢)

عقب سيجارتك

عقب سيجارتك
اللى انت طفیته فی أحلامی
لسوع أحاسیسی،

حرق العواميد المتهالكة..
اللى بتحمل تمثالك،
طير كل العصافير اللى ف قلبى..
بنفخة دخان
دوستك على قلبى..
قطعت شريانى اللى بينقل دمي (لأنهارك)،
قلبي اللى اختارك حاكم مطلق على مملكته،
وأدأك مفتاح زنزانته..
حبا.. فى الحرية!
ما اتصورش انه هايبقى فى يوم..
طفاية لعقب سيجارتك..
أو نقطة مطرة بتتدحرج..
على نضارتك
والوقتى..
لمنى من جواك،
خرجنى..
من تحت ضوافرك
احسن ماستحملتش ضيق شرايينك،
ومنعنى الردم اللى ف قلبك..
أوصل لنهاية المشوار،
طب ليه تسمحلى امشى فى وجدانك..
وانت مطفى اللمض اللى ف عواميدك،
وشوارعك كلها محتلة؟
ليه اديتنى الحق اتمدد فى وريدك

واتغطى بجلدك.. وأحلم
وانت ف عز منامى بتكتب..
تصريح بالدفن؟
إعذرني..
ماقدرتش احبك
علشانك مغرم بالغزوات..
وبريحة الدم
وثجاربى معاك..
تمنعنى اتدفى بشمسك،
وألبس احاسيسك
دورت ف نفسى
يمكن الاقى صديد جوايا،
والسحب السوداء تكون فى سمايا
بس لقيت البصمة بتاعتك..
ع السكاكين المرشوقة فى عضمى
واسمحلئ..
من قبل ما اموت فى عروقتك..
ولا اتفحم.. من عقب سيجارتك
أخرج..
من تحت ضوافرك،
واهرب..
بالكام حته الباقيين من جسمى

(٣)

إركب أسرع قطر ف دمك

إتفرّج على دمي شوية

قبل ما تغسل وشك بيه

حقّق فيه

وانت هتعرف.. إنه بينزف من (أوردتك)

واوعى تحاول تقطع نفسك منى

أحسن دمك مش ها يكفى..

إنك تعمل منه حياه

بصّ ف قلبك

تلقى مشاعرك:

واقفة بلهفة بتستنانى

خشّ ويريدك

تلقى جنازة بتمشى ف دمك

تلقى مكان محجوز علشانى

فكّ احبالك

واركب أسرع قطر ف دمك

واجرى الحقنى قبل ما اتوه

ونا هحدف لك..

باقى العرق اللى انت قطعتة

امسكه جامد،

وارجع تانى ارتاح فى ويريدى،

ومفيش داعى تضيع وقتك

وانت بتتفرّج على دمي

(٤)

وجع

مسمارك المقطوم فى قلبى..
لسه بيفكرنى بالتار القديم
مع إنى يومياً..
بنفّض قلبى جامد م العفار
لكن ليلاى..
كل ما اتقلّب على جنايى..
يغزّ ف قلبى مسمارك،
ودمى يخرّ من تانى
عموماً..
العلاج هيطول،
وصدقنى..
أنا مسامحك،
وكل شوية باتلّفت واقول يمكن..
تجيني تحط فوق جرح السنين وردة..
تمدّ جذورها جوايا،
وتطرح لك فى قلبى (سماح)

(٥)

ساعدنى انى اسامحك

ساعدنى إنى اسامحك،
وغير هدومك..
عشان لسه دمي اللي سايل عليها..

بیرج بقلبی لأوان (الدبیح)
هدومك ستایر بتفصل ما بیننا
یوماتی تعایرنی بمرار الهزیمه،
وترمی لرماد ذکریاتى الهشیم
هدومك دى ضدك
عشانها بصراحة..
یوماتی تطالبنى.. بحق (القصاص)
ساعدنى انى اسامحك،
وقصقص ضوافرك
عشان لسه لحمى اللی لازق علیها..
بیرج بقلبی لأوان (الولیمه)
بیرسم لى إیدك فى یوم ما اشتیهتنى..
وسابقت (إیدیهم)..
وتاجرت بلحمى ف مداين (شكك) **سجله**
ساعدنى انى اسامحك
وشیل العفار المکوم فى قورتك..
وبتجاوز بحول انك تحول سواده لعلامة صلا،
وقبل المحاکم ما تقفل بیانها..
وتغسل خطیتک بدم ا لعدالة..
تعالی تلاقینى.. هناك فى انتظارك،
وغير شهادتك.. وقول الحقیقه،
وناول لسانك حروف الخلاص
تعالی تلاقینى..
بحول دموع انهزامى لمطر..

يزيل الجنازة الى سدّ قبالك..
بيبان السما
ساعتها الغفار الى لازق في قورتك..
هايصبح هلال،
ويصبح لخطوة وجودك دبيب
ساعدني اني اسامحك
عشان باختصار..
♥ ماعادش في حياتي وحياتك مساحة..
تكفى المبارزة
ولو متّ قبلي.
هاصمّ يلفوك بنفس (الهدوم).
وترحل بدمي،
ولو متّ قبلك..
فكيفي اني اقول لك:
هاموت مش مسامحك

(٦)

لازم تدفنتي

رجّع جثمانى الى انت سرقتة لاني..
بارفض تدفنتي ف قلبك،
وتغسلنى بإيدك
كرباجك لسه معلم فى مشاعري،
وضوافرك مقطومة ف وجدانى
عارف؟

اجمل شىء فى الموت..
إنى ارتحت من الجلد على إيدىك،
من بركان الغضب الفاير فى عنىك،
ومن المخبر..
اللى مراقب.. احاسيسى
عارف؟
لو كنت اقدر..
كنت جدلت عروقى مشانق،
كنت نحتت صوابعى بنادق،
كنت رويت من دمك صحرة أحزانى
لكن موجى تمللى بيتكسر..
قبل الشط
وما بقدرشى..
غير على كتم الآه
والوقت..
إنتصرت عليك بالموت
وهاسيبك
من غير جثة تمارس فيها..
هواية الجلد
دانت بجد بجد رهيب
حزنان على موتى
وبتستخسر فياً الدفن
عمال بتحاول تحيينى.
(بالكرباج)

بس اناك...
إن انا مَيِّت .. مَيِّت .. مَيِّت
وما عدَّتْش هَشْعَر بِضَوافِرِك
وشوَيَّة شَوِيَّة
هَجِيْف فِي إِيدِيكِ،
وساعتها..
غَصِبِن عَنْكِ..
لازم تدفِنني

رسمتك.. بين خلایا

فی ضلمة لیلک الضم لك..
نجومی.. تاج.. علی راسك
وبفرد لك.. شرايینی..
سطور ترمح فی كراسك
فی يوم فرحك.. تضمینی
اسافر بین خلایاکی
فی يوم جرحك تلاقینی
أشرب دم ویاکی
واضفر لك شرايینی..
تكاعیب ضل فوق بابك
واموت شابك..
مشاعری ف طرف جلبابك
دنا العش اللى مرجحته علی فرعك،
ونا القلب اللى بیصلی علی شرعك
باشوف فیکی..
مشاعر ما اقدر اوصفها.. ونا شاعر
ولا احکیها..
ملامح تعجز الریشة..
فی إید فنان تحاکیها
وبافرش تحت رجليکی مشاعری نجیل،
وباصلب لك ولادی نخیل..
يعشش فوق خطاویکی

باغنيك.. وقلبي هومنديك..
بيسمح من على عنيكي سحاب الهم
ولو غفر عليكي الريح
أحميكي .. ولو بالدم
تقولي الآه.. تلاقيني..
مشاعري كلها تتلم
تقول مالك؟
سلامتك من غبار يلزق على ريشك
أدوب قلبي فوق النار،
وأصبه بين خرابيشك
ولا تحلى الحياة إلا .. لو اتأملها من شيشك،
ولو يقسى عليكي الليل،
ويرسم على الندى جراحك
أرش مشاعري بودة حب لجراحك
أشدّ الضلع من صدرى..
واشكل حواً افراحك،
ولو تجرحني أيام المتاهة السود..
يطيب الجرح لو ملس عليه قطنك،
وما يزقزقش عصفورى الا فوق غصنك
ولو هتبصى جوايا..
هاتلقيني
رسمتك بين خلايايا
عشان لو. مت فى الغربة..
يعيدم.. جتتي لحضنك

أمى الحزينة

رافضة السنادى هديتى
بتبصّ لى.. بطرف عين الانكسار
وتقوللى حطّ الورد دا..
على تربة اخواتك
وإزازه الريحة.. ياريت..
تغسل بها الأشلاء
وقماشة الفستان تفصلها.. كفن
ولادى يا ابنى بتندفن وجاى تهادينى؟
دبل فى إيدى الورد
حسيت بانكماش
ودموعى سالت عالقماش..
وبؤشت تشجيرة الفستان
لممت نفسى من الشتات
وسندت فوق كتف الهزيمة
وقلت باستحياء
أنا عابزك..تسامحينى
الطلقة متحاشة ف مشاعرى
والريح.. كسر لى البندقية
والليل.. دفننى .. فى الهدوم
نفسى أعوم..

لكن كلاب البحر يبيعهم شواطئى
وف متاهة خطوتى.. بيخرمسوا الفوانيس
وشنطة الأحزان.. على ضهرى اتملت كراريس
هربان من الأحاسيس..
وجاى عشان أقدم لك هدية حزن
يمكن يامه أنسيكى
يامه.. أنا فديكى بأخر شقطة من عمرى
دموعك الديناميت بتتفجّر بها الأوجاع
إبنك جرى يا مه..
ماخافش م الضلعة ولا..
عضة كلاب الغيط
وعمرى ما و طيت ..لغير إنى..
أبوس إيدك
يا مه افرحى بعيدك
دا لسه محطة الأحزان..
ها تستقبل كثير...قطورات
سرب الجراد.. هاجم علي غيطك
وألّف فاس بيصدّعوا حيّطك
ونا.. على حصو الفلا.. حافى
شايّل على كتافى.. عيال همك
وعساكر الأحزان بتحتل ابتسامتى
حاسس بإيد الأرض بتجرجر فى هامتى
لكن ضرورى.. تضحكى يا مه
برغم مرارة المحنة..

وريشة مسخ بتشوه ملامحنا
وايد فاجرة..
فى كل اذان.. تعريكي
حاسس أنا بيكي
دم الولاد.. لغمط غناويكى
موتهم على حجر ميم لك مواويلك
والدمع سائل.. م الفرات..
على خدود.. نيلك
حاسس بقهرك.
بالخنجر المغروس فى ضهرك
م اللى اشترى بمهرك..
إله.. طباشير
ونا فقير يا مه
ماملكش حق الطلقة والمدفع
ما ملكش غير تصريح..
بدفن الحزن جوايا
حملك تقيل يا مه
لكن.. حبايبك .. كل دول.. جايين..
يشيلوا الحمل ويأيا

سلفنى عكازك

إلى /أخى العراقى
الذى تناثرت دماؤه فشوهت ملامحى

سلفنى عكازك
أحسن نسيت رجلى على سرير المرض
ونفسى أكون فى الوقت دا جنبك
أنا الحبيب اللى الضباب توهنى عن قلبك
واقف براقبك (من بعيد)
شايك وحيد
راكب حصان القادسية تآزر الخنساء
بدمك البنور بتروى كربلاء،
وتناول السيف للحسين
من غير ما تسأل عنى فىن،
مستكفى بالدم اللى خارج من وريدك،
حالف ما تكتب غير بإيدك للوطن مواويل،
وبتخطف الراية من (الإيد اللى عاجزة تشيل)،
وبتجرى خلف (الموت)
واما الوطن أصبح سجين محتل..
عملت من جتت الحبايب تل..
ووقفت فوقه تشد (بالعكاز)..
خيوط فجرك

ما هو انت (بالعكاز) سبقتنا كلنا،
ورحت تطلب للشجر إيد الربيع
رافض تبيع وردك لتجار الحطب،
رافض تكون إلا العراقى،
رافض شعار (مات الفدائى)..
طول مانت غارس للوطن جدر الحياة،

طول مانت واهب للمدن دمك (سبيل)
ووشوشنا لماهترسم ع الغيم..
ها تبقى (انت) الجميل.
انت اللى خالى من العكارة،
انت اللى بتحطم تماثيلنا الحجارة،
انت اللى رافض من زمان تبيع عزالك فى المزاد،
وفضلت تتمرغ فى دمك..
وانت حاضن بالقوى بغداد
شايل فى قلبك حلمها،
وماشى (تعرج) ع الخريطة تلمها،
وتكتب لها بدمك نشيد
واقف براقبك (من بعيد)
وعشان ماتحرجنيش عاطيني تمللى ضهرك
بس صدقنى انى شايل نص قهرك،
وانت شايف كام مراقب ع الحدود..
مانعيني ادحرج لك مشاعرى ف قنبلة،
ما نعيننى احط عنيا ف سلاح العروبة طلقتين

بينى.. وبينك.. خطوتين
بس القانون حاططلى فيهم ميت لغم
ومش هاعدى سليم بدون ماتجيب لى عكازى
سلفنى عكازك..
أدوس به ع الألغام واعدليك
ينوينى من نخلك شوية خوص
ينوينى من وردك تقاوى عبير
يبقالى (آية) فى (سفر) إنجازك
سلفنى عكازك..
أمشييه لو خطوة
أحسن مكان رجليا عطن م الوقوف
إسلخنى من جلدى اللى مات،
قشرمشاعرى تلقى جواها المدافع،
وتلقى قلبى (فى الحصار) واقف يدافع..
عن النخلة اللى طارحة المجد
دمك فى (نجد) وفى (الخليج)
سائل على افخاد العروبة
وفرخة اخواتك فى يوم جوعك..
ما باضتتش غير (طوية)،
ف ربطت فوق بطنك (بارود)
ومشيت تلملم جنتك
مش لاقى إيد تتمد لك،
وتناولك اللحم المبعزق ع الهدوم
وقعت وبترجع تقوم،

وتشد روحك من إيدين الدوامات،
ونصك التحتاني مات
لكن بتزحف ع الإزان،
وتشب فوق كتف السما
تكتب بضلع ابنك سطور الملحمة
وتشد عصفور الوطن..
من بين سنان وحش الفلا
واقف لوحك في الخلا،
والوحش جازر ألف كلب وراه
بيسلطوا المدفع قبال (الله)
ونا لسه واقف ع الحدود
راشق مشاعري ف شاشة التلفاز،
ونفسي أجيلك إنما..
أجيب منين (عكاز)؟

السحابة لسه فيها سنين شتا

إلى .. من استمد الوطن من جسده المشلول
(حرية الحركة) الشهيد/ احمد ياسين

محركات تفكيرى عطلت..
لما حنّ لحمه من جسمه «القعيد»..
تطّأت .. فى عيني،
وأما «مخه»
.. هدّ سور الجمجمة،
وما عادش فاضل منه غير..
لحية، وعين،
وحنّة من قورته وعلامة..
للصلا
ذهنى ابتدا .. يرجع لبيته،
وانحنيت .. عالصورة ابوس..
دمه اللى بقّع..
فوق ملاية .. إحساساتى
يا ترى.
مكتوب لى اشوف ..موتة «عمر»..
لكن فى جسم أحمد ياسين؟
خارج .. من الجامع..
ولسه ملايكته . حواليه،

ولسه الفجر بيعكّز على كتف الأذان..
واما الضمير..
زحفت على حيطانه الديدان
اتحالت «الشياطين».. على..
دبح «الملاك»
دبح «الكسيح» اللي رفض..
يمشى على.. رجلين عدوّه
ما انت يا أحمد..
كان لابد انك تموت
عشان تأكد للوطن..
إنك.. من «الخلفة الحلال»
وتشيل خطايا اللي احتموا. فى الخوف،
وتثبت للتاريخ أن الوطن..
ياما. ها يقعد فى (الصوان)..
ياخد فى أحبابه (العزا)
وألّف (رنتيسى) و(ياسين)..
هيسلموا لبعض الكفن
طول ما التتار واقفين على أبواب المدن،
و (عروشنا) رهن (الاحتلال)
والدم شلال الوطن
بس الجميل انك تشوف..
الدم بيخصب تراب الأرض وبيطرح عيال
عيال بطعم الشهد والموت اللذيذ،
عيال بتصعد للسما بزفة ومواكب

واللى هيراقب سمانا
يشوف غمامة كبيرة زاحفة على الوطن
وعشان كده..
لا بد نبحت عن (مظلة)
لا السحابة..
لسه فيها سنين شتا

الضل

(عايز تكون لك إيد قوية؟ وتعيش بدال العمر ميه؟ حافظ على.. ضلك
عشان.. الضل حقه فى المكان. الضل إثبات الهوية)

خايف على (ضلى)..
لا تتبعتر ملامحه،
والسحابة السوداء تكنس به الطريق،
ويدوس عليه حافر (هولاكو)،
وأرضى تترمل،
ويصبح ورثى فى المشتل (شوية شوك)
بخاف لاف يوم ابص ورايا فجأة..
مالقانيش،
وينسرق ضلى..
ونامشغول
برسم ملامحى ع النخلة اللي ما بتطرحش،
والقى.. دمي سايل ع السكك..
يمسح خطوط عرضى.. وطولى،
واتصلب على بوابات عمرى اللي جى
أهرب من الخوف إلى راكب فوق كتافى..
واجرى.. ورا.. ضلى بطول الأرض وتخوننى..
هشاشة عضمى واترنح،

أقع من نفسي وأمدّ (لنفسى) إيد واقف..
عشان خايف..
لا إيد العتمة تسرق منى ضلى واتوه،
ولازم اخاف،
واخلى الشمس ترسم هيكلى فى الكون،
عشان ما تضيعش من رجلى..
خطاوى مشوها أجدادى،
واسيب لولادى حبة ضل يحموهم..
من الصهد اللى جاى م الغرب

الحفرة

من خرم إبرة قلبى بيهجّ انفعالى
أصرخ بصوت عالى،
وارشق سهام الصرخة فى قلوبكوا الخشب:
لمحتكم..
والديب واخذكم تحت باطه..
لما انبطحتوا فوق بلاطه
وشاورتوا بصباغكوا (المأتب) ترشده..
عن مخبا (الأخ) الوسيم،
ودم اخوكم لسه بيطرطش على قلوبكوا السفنج،
وقميصه أصبح عرضكوا المفضوح
ما تغلسوش إيدكم عشان الدم وشم..
عاضض لحومكوا الميتة
كتب التاريخ أسماكو بالقلم (الرصاص)..
من يوم ما شافكم وانتوا عاطيين ضهركم للنهر..
وتصلوا (صلا استقسا)
ودمكوا المتعبى فى المسقة..
بيسكر دولة الغربان،
واقفين على.. باب العبث (مانيكان)..
تتقاس على جتكم هدوم العرى..
وتولوا الوشوش لبيوت (بدون حرمة)

واخوكم اللى فصيلة دمكوا ف قلبه..
بيموت قطيس،
وكل واحد عنكم..
الديب محضّر له القميص
والدايرة بتضيق والقفص..
بيجنى ضهر الحلم،
والكرباج حفر.. فى ضهر كل المرعويين نفق..
بيبدأ.. من هرم (خوفنا)..
لآخر نجمة حطت ضيها ف حجر الضلام،
والحفرة واسعة،
والجزم.. لازق على انعالها الصابون،
واللى بيقع.. يا ويله م السكاكين
لا هيلاقى العدالة بتحتكم لـ «ميزان»..
ولا يلاقى (حقوق إنسان)،
ومش هيلاقى تحت الشمس إلا.. مكان..
يا دوب بينى عليه (قبره)
ما هو اللى اختصر عمره..
عشان يلحق يموت
والموت برىء من دم كل اللى انتحر،
ودم كل اللى اترمى (بإرادته) فى الحفرة

المغرب أدن

والشمس خشت سجنها..
شائلة على أيديها النهار،
والخوف من العفاريت رسم...
فى عيوننا بيت أشباح،
وخيل الرهبة طاح جوه البدن..
يحط نطفة خوفنا فى الأرحام
المغرب أدن والشوارع عربدت فيها الكلاب،
وستارة الضلمة..
مخرمها (النباح)
وبدأنا نتهيا وشوش الجان
ودستورنا الجبان..
حدد إقامة دمننا برة الوريد
عودنا لما.. نسمع المغرب..
نشد عيوننا ونسلمها لإيديين العما (أمانات)
المغرب أدن.. ياترى..
لما جنود إبليس هتحتل المدن..
هنصلى فين؟
ونجيب منين (إمام) يحرر فجرنا،
يحمينا م الضلمة؟
دا من يوم الإمام دا مامات..

لقينا الكل قام بنقض الوضوء،
واتحكمت فيه الخلايا الميتة،
وبقعة الحبر اللي خرت من مشاعره..
لوثت نهره الحليب،
واتقوكت روحه ف محارات العدم
وفين نلاقى إمام؟
وفين ممكن نلاقى للإمام (أنصار)
وأهل النار بيطردهم الملائكة من البيوت؟
والمغرب أدن.. والوطاويط..
جاية تحتل المدن،
والوقت ضيق و (الخلاص) محتاج سفر،
ون كنت ما قريتش (الكتاب)..
كنت اسأل العراف سؤال جاهل غبي:
مفيش نبي..
يظهر في أطراف المدن؟
يضرب بديل (بقرته) جثمان الحياه؟
يلمنا.. جوة (السفينة) ؟
يدعى على وحوش المدينة بالفناء؟
من خوفى بسأل عن نبي
مع إني عارف إننا..
خسارة فينا الأنبياء

محتاجين لك

تنولد تانى فى عام..
الألف «فيل»
مشتاقين للفجر يطلع من جبينك
محتاجينك..
تحفر الخندق تشيل من قلبنا..
كوم التراب
هجمة الاجزاب على خندقنا اقوى من الحصون
و «الكتاب» مغروس فى جنبه..
ألف رمح
والقبيلة فى انتظار لحظة شروقك ع الملاء
تشعل الشمع الالهى فى النفق
نلتمس فيك السلام
محتاجين فعلا نصلى
بس تبقى انت الإمام
تنولد شمس الخلاص
جوة سرداب النفوس
إنطفى ف إيدنا الفانوس،
والليل دلق حبره على..
وش المدينة،
والنهار.. بعدك مليل
كل هبة ريح بتكسر فينا ضلع،
كل يوم بيموت..
فى حجر الأمة عيل،

واللى فاضل من هـومنا ..
مش ساترنا
فانتبهنا ..
إننا سبناك .. وتوهنا
عز ما احنا .. محتاجين لك
ترمى حفنة من تراب ..
فى عيون أعاديك اللى رجـعوا يعسـكروك ..
لما سمعوا بموت (على)
بس لما يقربوا منك خطاهم ..
هـيلاقونا كلنا نايمين مكانك فى الفراش
دا الكتاب اللى ف ايديهم ما اتقراش
لو قروه ..
هـيلاقوه مكتوب بنورك،
ويلاقوك نايم فى أحضان المسيح
راضع معاه من صدر مريم
بس عين الجهل دايمـا نورها مطفى
والقلوب العميا صعب تلاقى ع «الأرض السلام»
صعب توهب للحياقو «الناس مسرة»
محتاجين لك ألف مرة
نكتب «البـيعة» الأخيرة ونعشقك
نستشـقك،
تبقى شمس قلوبنا واحنا ..
نبقى ضلـك
دا حنا فعلا ...
محتاجين لك
محتاجين لك
محتاجين لك

المحتوى

٦	إهداء
٧	أنا منكم
٨	الصرخة
١٠	حافى.. فى دولة المسامير
١١	المشى عكس الاتجاه
١٣	زوايا الفراغ
١٥	حوّاً.. مش من طين ودم
١٧	الأعراف
١٩	الهوا اللى ف صدرى حادق
٢١	عينى أوسع م الصور
٢٣	كلب مسعور
٢٥	عود كبريت
٢٧	روحى آيلة للسقوط
٣٠	مواجهة
٣٢	أنا المزيف
٣٤	مش موجود
٣٦	أنا اتحجمت فى النقطة
٤٠	إرميلي طوق
٤٢	وضاق الكون على جسمى

٤٤	غريب
٤٦	عفار
٤٨	تأمل
٥٠	بنعيش.. بنصّ روح
٥٢	عصفور.. وألف ديناصور
٥٤	الموت في السر
٥٥	رجلياً الخشب
٥٧	هزّني
٥٩	إلي صديق تحالفت ضده أسراب العناكب أخونك
٦٢	تستلّفنّي؟
٦٣	شريكتي في الرحلة الجميلة
٦٥	سداسية (المحاكمة)
٧٥	رسمتك.. بين خلایا
٧٧	أمی الحزينة
٨٠	سلفني عكازك
٨٤	السحابة لسه فيها سنين شتا
٨٧	الضّل
٨٩	الحفرة
٩١	المغرب أدنّ
٩٣	محتاجين لك